



Upozorenje na opasnost glasina i podstrek na pomaganje Palestincima (Medina)

Hatib: dr. Husejn ibn Abdulaziz Alu Šejh

19. rebiul-ahir 1445. god. po Hidžri / 3. novembar 2023.

Sva zahvala pripada Allahu, zaštitniku čestitih. Svjedočim da nema boga osim Allaha, Svemoćnog i Veličanstvenog Gospodara. Svjedočim da je Muhammed Allahov poslanik i miljenik, i Njegov plemeniti izaslanik, neka su mir i spas na njega, na njegovu časnu porodicu i sve vrle ashabe.

Poštovani vjernici! Najveće dobro u koje jedni druge možemo pozivati jeste bogobožnost, pokornost Allahu koja se iskazuje izvršavanjem Njegovih naredbi i izbjegavanjem Njegovih zabrana. Bogobožnost je jedini izlaz iz svake vrste tjeskoba, to je najveći povod kojim se zavređuje pobjeda i prevlast.

Uzvišeni kaže: "A onome koji se Allaha boji, On će izlaz naći." (Et-Talak, 2)

"A onome ko se Allaha boji, On će sve što mu treba učiniti dostupnim." (Et-Talak, 4)

"Allah je zaista na strani onih koji se Njega boje i grijeha klone i koji dobra djela čine." (En-Nahl, 128)

Poštovani vjernici! Jedna od velikih opasnosti koje mogu nanijeti štetu pojedincu i društvu u cijelosti jesu glasine koje se olako prenose, bez traganja za dokazom koji ih potvrđuje ili bilo kakvim vidom potvrde njihove istinitosti. Glasine, koje se emituju preko medijskih sredstava, čiji izvor ostaje anoniman i nepoznat, jesu laži koje u društvo unose rasplamsalo zlo i potpiruju velike smutnje.

Takve glasine svojim predmetom tretiraju različite teme, a zajedničko im je da šire strah i nemir u društvu, ružnim i pogrđnim imenima opisuju pretpostavljene među vjernicima i učenjake muslimanske zajednice. Pokrenute su sa zlim namjerama i nečasnim ciljevima.





Glasine tako postaju smrtonosno oružje kojim se neprijatelj koristi kako bi ummet uništio, kako bi u njemu posijao razdor i uništio jedinstvo. Davno je pronađena izjava u zapisima neprijatelja: "Mediji su u našim rukama, koristit ćemo se time kako bismo glasine širili. Ponavljat ćemo ih sve dok ne postanu istina." Dakle, neprijatelji koriste glasine kao jedno od sredstava kojim odvrćaju ljude od upute Gospodara i Njegove vjere. S tehnološkim napretkom svijeta, takvo djelovanje preraslo je u jasno definisanu industriju, koja slijedi precizirana pravila s ciljem da se, i u miru i u ratu, unište određene države: politički, ekonomski, moralno.

Poštovani vjernici! Stav muslimana naspram glasila trebao bi biti u skladu s uputom islama, koja poziva čovjeka da bude razborit i oprezan, i da bude svjestan štete uzrokovane glasinama. Uzvišeni Allah kaže: "Kada saznaju za nešto važno, a tiče se sigurnosti ili opasnosti, oni to razglase. A da se oni s tim obrate Poslaniku ili predstavnicima svojim, saznali bi od njih ono što žele saznati. A da nije Allahove dobrote prema vama i milosti Njegove, i vi biste, osim malo vas, sigurno, šejtana slijedili." (En-Nisa, 83)

Ovaj ajet je veličanstven. Njegovo značenje može spoznati samo onaj kome Uzvišeni uputu daruje. Suština ajeta je da su muslimani, kada se pojavi nešto važno što se tiče cijele zajednice, bilo da je vezano za sigurnost i sreću ili za strah i iskušenje – dužni da provjere istinitost vijesti, nikako da požure sa širenjem vijest. Oni su dužni, nakon smrti Poslanika, sallallahu alejhi ve sellem, da se s tim obrate svojim pretpostavljenim, tj. onima koji su upoznati sa suštinom stvari i koji mogu proniknuti kakve su koristi i štete od širenja takvih vijesti.

Način djelovanja koji je sadržan u ajetu podrazumijeva zabranjenost da čovjeka obuzmu žurba i brzopletost, i da počne širiti vijesti čim ih čuje, nego je potrebno da dobro razmisli, nastoji proniknuti u suštinu i shvatiti posljedice. Islamski učenjaci pojašnjavaju: "Ajetom se zabranjuje da se šire vijesti, naročito u teškim vremenima, prije nego što se provjeri tačnost i uvjeri se da neće nastati velika šteta od njih." Uzvišeni Allah naređuje nam da temeljito provjerimo istinitost vijesti u ajetu: "O vjernici, ako vam nekakav nepošten čovjek donese kakvu vijest, dobro je provjerite,





da u neznanju nekome zlo ne učinite, pa da se zbog onoga što ste učinili pokajete.”
(El-Hudžurat, 6)

Poslanik, sallallahu alejhi ve sellem, podučio je svoj ummet tome da je potrebno smireno postupati, provjeriti vijesti i zatražiti pojašnjenje, skrenuvši im pažnju na opasnost širenja vijesti istog trenutka kada se saznaju. Ebu Hurejra, radijallahu anhu, prenosi da je Poslanik, sallallahu alejhi ve sellem, rekao: “Čovjek će izgovoriti riječ, kojoj ne pridaje značaj, ali će zbog nje završiti u Džehennemu padajući strmovito koliko je daleko istok od zapada.” (Muttefekun alejhi) Hadisom se poručuje da će čovjek izgovoriti riječ kojoj ne pridaje značaj, ne razmišlja o tome koliko je ona ružna, koliko zla nanosi domovini i društvu. Spas za pojedinca i društvo leži u pridržavanju poslaničke upute: “Ko vjeruje u Allaha i Sudnji dan – neka govori dobro ili neka šuti.”

Poslanik, sallallahu alejhi ve sellem, upozorava nas na pogubnost širenja vijesti ukoliko sa sigurnošću ne znamo da su istinite, rekavši: “Loš li je oslonac čovjeku tvrdnja: ‘Kazali su mi.’” (Ebu Davud, vjerodostojan) Glasine i tvrdnje čija istinitost nije provjerena loš su temelj za izgradnju ubjeđenja, jer su tvrdnje i glasine uglavnom rezultat sumnjičavosti i nagađanja.

Zato, poštovani vjernici, pridržavajmo se islamskog pravila o nužnosti provjere i razjašnjavanja, kako bi zlonamjernici bili spriječeni, a time i štetne posljedice. Uzvišeni kaže: “On ne izusti nijednu riječ, a da pored njega nije prisutan onaj koji bdije.” (Kaf, 18)

Poslanik, sallallahu alejhi ve sellem, kazuje: “Dosta li je grijeha čovjeku da prenese sve što čuje.” (Muslim) Ko bude prenosio sve što čuje ne provjeravajući istinitost tih vijesti, grešan je i neminovno će nekada prenijeti i neku lažnu vijest, stoga se čuvajmo posljedica širenja glasina i propagande. Poslanik, sallallahu alejhi ve sellem, kaže: “Uzvišeni Allah mrzi da činite troje: da prenosite neprovjerene vijesti, da mnogo zapitkujete i da rasipate imetak.”





Poštovani vjernici! Islamski ummet odlikuje se time što je osviješćen, njegovi pripadnici ne vjeruju u sve što se kaže i prenosi, a da ne provjere istinitost i tačnost toga. Potrebno je da vjernik bude pronicljiv, oprezan, i u potpunosti svjestan namjera i spletki neprijatelja.

Uzvišeni kaže: "Oni su pravi neprijatelji, pa ih se pričuvaj!" (El-Munafikun, 4)

"Zašto, čim ste to čuli, nisu vjernici i vjernice jedni o drugima dobro pomislili i rekli: 'Ovo je očita potvora!'" (En-Nur, 12)

Poštovani vjernici! Spriječiti zlo ovih zlonamjernih glasina moguće je postupanjem u skladu sa spomenutim vjerskim odredbama, djelovanjem mudro i umjereno, dobrom procjenom situacije, potpomaganjem i pružanjem podrške pretpostavljenima, uz jedinstvenost djelovanja u koristi vjere i ovozemaljskih zajedničkih dobrobiti. Svi bismo se trebali paziti bitki koji se vode preko društvenih mreža u vidu rasprava koje ne donose nikakvu korist, niti služe bilo kojoj svrsi.

Pored toga, potrebno je da čovjek pazi da ne krene za svakim telalom, da se ne okreće za svakim povikom, jer Uzvišeni nas upozorava na to riječima: "A među vama ima i onih koji ih rado slušaju." Molim Uzvišenog da nas sačuva od zlih obmana, koje uočimo i koje neprimjetne ostanu!

U ovim i sličnim vremenima, vremenima iskušenja i nedaća, potrebno je da se pripazimo tvrdnji, uglavnom lažnih, koje se zloupotrebljavaju na društvenim mrežama. Takve vijesti iznose se pod tvrdnjom brige o ummetu i iskrenom doprinosu pitanjima koja ga se tiču, ali, zapravo, oni u ummetu donose još veće obmane, dovode do veće opasnosti i uzrokuju još veće smutnje. Svaki put kada se dogodi neka nesreća, oni je pretvore u obmanu i razdor u društvu, a historija je ponajbolji svjedok tome jer je sve zabilježila.

Sada, poštovani vjernici, pravo je vrijeme da mudro i marljivo djelujemo u saradnji sa svojim pretpostavljenima, na način da spriječimo zlo koje prijeti muslimanima, odričući se ličnih emocija i emotivnog djelovanja koje nije u skladu sa spoznajom suštine dešavanja, uključujući spletku koje se kuju islamu i muslimanima. Sada je





pravo vrijeme da krenemo putem mudrog i ispravnog djelovanja kakvo određuju osnovne intencije islamskog vjerazakona, u svjetlu čega ćemo organizovati vlastiti život, donijeti pobjedu vjeri, pobijediti u pitanjima koja se tiču ummeta, na način da ćemo jedinstveno i usklađeno govoriti i djelovati. Koliko je samo islamski ummet propatio usljed poziva i hipoteza koje su propagirane tokom prethodnih desetljeća, a što mu je nanijelo isključivo razdor, uništenje i protjerivanje. Potrebno je da islamski ummet reaguje protiv obmana plodonosnom saradnjom, bratskim jedinstvom, međusobnim potpomaganjem, u duhu pravila islamskog vjerazakona i osnovnih postulata mudrosti. Ovakvo djelovanje, zajedno s čvrstom vjerom u Allaha, uz Njegovovo dopuštenje, omogućit će da se jasno vide posljedice i krajnji rezultati događaja. Ako su namjere iskrene, a djelovanje u ime pobjede islama i muslimana je ispravno – shodno sunnetu, te je rezultat jasne, stopostotne, proučene i islamom nadahnute percepcije, nikako rezultat emocija – rezultat će biti pohvalan, ciljevi će biti ostvareni i plod truda će se ubrati. U duhu toga ističimo ono oko čega se ummet ovih dana objedinio, uključujući narode i vodstvo, da se preda sav značaj gorućoj temi ovih dana – neviđenoj nepravdi, neopisivom terorističkom djelovanju i zločinu čije razmjere i opakost riječi ne mogu opisati, a koji ovih dana okupacione snage sprovode nad stanovnicima Gaze.

Poštovani vjernici! Pomozimo jedni drugima, savjetujmo jedni druge! Pomozimo muslimanima u Gazi kako god možemo, iskreno u ime Allaha, čineći na takav način ibadet samo Njemu, moleći se za Njegovu pomoć, pobjedu i prevlast. Brižno čuvajmo naše jedinstvo i jedinstveno djelujmo, a čuvajmo se spletki neprijatelja i neprijateljskih postupaka.

Oni koji ove nemile događaje koriste kako bi druge ocrnili i razdor sijali jesu oni koji postupaju prema željama neprijatelja koji nas vrebaju. Islamski ummet je oličenje jedinstva i saosjećanja, saradnje i savjetovanja, dobronamjernosti i iskrenosti; nikako nije slika slabosti i zavade, varanja i obmane. Uzvišeni naređuje: "Jedni drugima pomažite u dobročinstvu i čestitosti." (El-Maida, 2)





Zemlja dva časna hrama, uistinu, otkad je osnovana, uključujući vlast i cijelo društvo, učenjake i sve ljude, jedna je od najvažnijih zemalja kojima historija pamti pohvalne postupke i veliku pomoć palestinskom pitanju i Palestincima. Ovakvo djelovanje pokrenuto je vjerskim osjećajima stroge dužnosti i to je princip kojeg se pridržavaju vođe ove zemlje i spoznaja pod kojom generacije stasavaju, tako da niko ne može njihova djela omalovažiti, osim ako je zlonamjerni zavidnik ili zli neprijatelj.

Radi toga, s ovog mjesta, pozivam sve ljude da se priključe inicijativi Sluge dva časna hrama i njegovog prijestolonasljednika da svi doniramo koliko je u našoj mogućnosti svojoj braći u Gazi. Poziv je posebno upućen bogatima i trgovcima! Požurimo, darujmo, udijelimo, privrijedimo dobro koje će nas čekati na Sudnjem danu. Poziv je upućen svakom vjerniku u ovoj zemlji da hitro udijeli onoliko koliko može, što je samo dio blagodati i opskrbe koju mu Uzvišeni daruje. Molim Uzvišenog da nas usmjeri na pravi put i da nam obilnu nagradu daruje! Uistinu, On nam je dovoljan i On je najbolji pomagač.

Uzvišeni Allah kaže: "Pozovite Me i zamolite, Ja ću vam se odazvati!" (Gafir, 60) Srcem skrušenim dovu Allahu uputimo! Gospodaru naš, Tebi se obraćamo, moleći Te Tvojim uzvišenim imenima i savršenim svojstvima! Silni Gospodaru, o Ti Koji što potlačenima pomažeš, a nepravednike uništavaš, spusti Svoju kaznu na neprijatelje. Gospodaru našu, pomози našoj braći u Gazi, sačuvaj ih sa svih strana. Gospodaru, učvrsti im srca i daruj im veliku pobjedu. Gospodaru naš, podari im još veću odlučnost. Ozdravljenje podari njihovim bolesnima, umrlima se smiluj, podari im stepen šehadeta. Uistinu, Ti si Milostivi, Samilosni. Gospodaru naš, sačuvaj muslimane ma gdje bili, ujedini ih, učini da jedinstveno prihvate Istinu i Poslanikov sunnet!

Zatim, znajte da vam je Allah naredio da donosite salavate i selame na Njegovog Vjerovjesnika, pa je rekao u mudroj Objavi: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim





"KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJJE
KOJU TOKOM HUTBE ELABORIRA." (PREPOROD)

HUTBE 

oprost za sebe, za vas i za sve muslimane od svakog grijeha, a tražite i vi, On mnogo
prašta i milostiv je.

